

الصبر لو له تقاوي أنا اللي أشتر به وأنا اللي أزرعه فدادين..
ولو صبري يعطش آخده في أحضاني وأوريه بدمي وبدموع العين..
وأصب علي صبري لو حتي ضهري اتحني وأكلت أنا الرغيف بالدين..
أنا أصلي دقت الصبر وصبري ع الصبر خللي الصبر وصلني..
ولما جاني الفرج مشيت أغني في البلد يا عين وأطمئن الصابرين..

اصحي يا صابر .: يا بو قلب نادر..
ع الصبر قادر .: غايب وحاضر..
في قلبنا..

...

ويا شيخ بدير .: صبرك كبير..
وده آخر خير .: ورا قوة كتير..
ناس قبلنا..

...

وابو الأصول .: صبرك مهول
خلاتي أقول .: تصبر تتول
كل المنا..

...

زناتي المسحراتي

صبرك جميل .: بالك طويل
للخير تميل .: علشان أصيل
يابو الهنا

...

اصحوا يا صابرين..
ووجدوا المعين..

...

يا بو قلب حر .: لو صبر مر..
خلي يمر .: لو حتي طال..

...

وإن حد هناك .: إثبت مكانك..
وإمسك زمامك .: يابو الرجال..

...

لا تقولي إنك .: انا قبل منك
صبرت زيك .: علي كل حال

...

مسيرها تفرج .: وتلاقي مخرج
بالصبر تخرج .: لوم المحال

...



عجبي علي ناس شربوا مرار الصبر لغاية صبرهم م اشتكي منهم..
وأما الحبايب فاتوهم في بحر الهواء الصبر كان الدوا لا نشغال بالهم
وأما خانوهم صحابهم في عز فرحتهم الصبر كان زادهم ورسمالهم..
ولما مال عليهم زمانهم وخانهم اتحملوا الصبر والهموم والويل..
لحد م الصبر اللي دوبهم وعذبهم هوّه اللي خدهمخ لباب الفرح وصلهم..

واصحي يا صبور..

ووجد الغفور..

...

واصحي يا حاج صابر .: صابر وانت صابر..

إنسان جميل ونادر .: م النادر يتوجد..

...

متلفع بالأمل .: من صبر لا يحتمل

فشر صبر الجمل .: ولا زيك في البلد

...

قوة وعزم زايد .: ونور غيمان وقايد..

بتصبر في الشدايد .: عشان عندك جلد..

...

اصحي غتسحر معانا .: وبكرة إفطر حوانا..

في الصبر لك مكاناً .: يا عمدة العمد..

...

زناتي المسحراتي

واصحوا يا صابرين
ووجدوا المعين

...

واصحي يا شيخ عسل .: الصبر في المثل
كان زاد كل الرسل .: في الدعوه للإيمان..

...

في الصعب والعسير .: لصغيراً وكبير..
الصبر آخره خير .: أيوب صبر زمان..

...

وعاش في محنته .: صابر علي بلوته..
ونهاية أزمته .: وصل بر الأمان

...

واصحي يا شيخ سعيد .: الصبر آخره عيد..
وده كلام أكيد .: يقولوا أخوك زناتي..

...

وزناتي أصله عنده .: ع الصبر عنده فكره
أعصابي الجامده نادرة .: وصار طول حياتي

...

والصبر مُر أيوه .: عملوا قساوته غنوه
لكن نهايته حلوة .: شغلني مسحراتي

...

واصحوا يا صابرين
ووجدوا المعين

أمانه ياللي إنظلمت في يوم إصبر علي ظلمك ولا تحزن ولا تزعل ولا تحتار
إفرد شراع مركبك يا جدع وخلي صبرك دفتك لو عاندك التيار
دا الصبر هوه الأمل للي ضناه الزمن في المحن وعاش حزين محتار
أمانه يا خل لا تمل م الصبر أبداً واحفض دروس الصبر واتعلم
ده الزرع لو يد بل علي عوده بالصبر يخضر ويفرع وبيتملي أزهار.

